



KOMMISSARISSTRAAT 64 • 64 KOMMISSARIS STREET WELGEMOED 7530 • T 021 913 2400 • admin@welgemoedpp.co.za

Boelie Beleid van Welgemoed Preprimêre Skool:

Doelstellings van die beleid:

- Om die skool se gedragkode, ander skoolreëls, beleide en programme te ondersteun om sodoende 'n veilige, vriendelike omgewing van omgee vir alle leerders te skep sodat hulle in 'n ontspanne en veilige atmosfeer kan leer.
- Om 'n klimaat te skep waarin leerders ingelig is sodat hulle alle vorms van boeliegedrag (afknouery) verstaan en bemagtig word om daarteen op te tree.
- Om leerders en ouers te verseker dat hulle ondersteun sal word wanneer boeliegedrag aangemeld word.
- Om boeliegedrag van enige aard deurlopend en effektief met 'n benadering van geen verdraagsaamheid te hanteer.
- Om te verseker dat leerders, ouers en personeel ten volle ingelig is oor die boeliebeleid en -prosedures en 'n produktiewe vennootskap aan te moedig.

Wat is “boelie”?

Om ander te boelie is opsetlike en voortdurende aggressiewe, onvriendelike en onbeleefde gedrag met die doel om 'n ander persoon seer te maak. Dit veroorsaak pyn en ongemak by die slagoffer. Boeliegedrag word geopenbaar as 'n individu of groep nie ophou met die afknouery wanneer hy/sy gevra word nie.

Boelie kan die volgende insluit:

- Emosioneel: uitsluiting, marteling, die beïnvloeding van ander om nie van iemand te hou nie, om iemand belaglik te maak, om iemand te probeer domineer
- Fisiek: stamp, skop, klap, vuisslaan of enige ander gebruik van geweld
- Rassisties: rassistiese aanmerkings, graffiti, gebare
- Seksueel: ongewensde liggaamlike kontak, seksueel-afbrekende aanmerkings
- Homofobies: weens die aard van, of fokus op die saak van seksualiteit
- Verbaal: die noem van name, sarkasme, versprei van stories, tergery, vuil taalgebruik, dreigemente
- Kuber: hou verband met die misbruik van internet, e-pos, selfoon, misbruik van tegnologie (bv. kamera- en videofasiliteite)

Waarom is dit belangrik om op te tree teen boeliegedrag?

Om geboelie te word, maak seer. Niemand verdien om die slagoffer daarvan te wees nie. Almal het die reg om met respek behandel te word. Leerders moet bemagtig word sodat hulle weet hoe om boeliegedrag te hanteer. Die skool het 'n verantwoordelikheid om onmiddellik en effektief te reageer op probleme met boeliegedrag. Die skool moet hulp verleen aan leerders wat geboelie word, sowel as aan die boelie self. Die boelie moenie net gedissiplineer word nie, maar ondersteun word in die aanleer van aanvaarbare maniere van gedrag.

Regte en Verantwoordelikhede:

Elke leerder van het die reg om:

- Veilig te wees en sonder vernedering of vrees te leer
- Gelukkig en vry te wees om met vriende te speel
- Ingesluit te word in klaskamer- en speelgrondaktiwiteite
- Gerespekteer te word
- Te leer hoe om konflik op 'n beleefde wyse op te los
- Te vra dat boeliegedrag gestop moet word en te vra vir hulp indien dit nie gebeur nie.

Elke leerder het die verantwoordelikheid om:

- Vriendelik en met respek teenoor ander op te tree sonder om te diskrimineer
- Met ander saam te werk in skoolaktiwiteite
- Aan die skool se prosedures deel te neem wanneer konflik opgelos word
- Boeliegedrag aan te meld.

Prosedures:

Op die speelgrond:

Leerders wat voel dat hulle geboelie word, mag enige van die onderwysers op die speelgrond nader. Indien die afknouery van fisieke of diskriminerende aard is, sal die saak tydens pouse na die onderwyser op die speelgrond verwys word.

In die klaskamer asook tydens Nasorg:

Die onderwysers in die klaskamer sal enige tipe van boeliegedrag hanteer. Indien die gedrag van sodanige aard is dat die leerders dit kan hanteer, sal hulle aangemoedig word om dit tydens pouse deur mediasie op te los. Indien nie, sal die onderwysers dit hanteer. Indien hierdie opvoeders van mening is dat 'n hoër vlak van ingryping nodig is, sal die Skoolhoof genader word vir hulp.

By Welgemoed Preprimêre Skool glo ons dat alle boelieverwante insidente met groot sensitiwiteit hanteer moet word. Die leerders sal individueel ondervra word en beide die boelie en die slagoffer sal met sorg hanteer word. Die regte van beide partye sal te alle tye beskerm word. Die behoeftes van beide individue sal oorweeg en aangespreek word.

Stappe wat gevolg gaan word:

1. Opvoeder teken alle gedragsprobleme/boeliegedrag aan.
2. Opvoeder het ouergesprek met ouers.
3. Indien boeliegedrag nie verander nie word die Skoolhoof ingeroep. Skoolhoof en opvoeder het gesprek met ouers. Aanbevelings word gemaak bv. speltherapie. Gereelde terugvoering is verpligtend.
4. Indien boeliegedrag nie verander nie word die ouer gekontak, die situasie verduidelik en gevra om hom/haar te kom haal.
5. Beheerliggaam word ingelig en het ouergesprek met ouers.
6. Indien daar geen verandering is nie sal die ouers deur die Beheerliggaam gevra word om die kleuter by 'n ander Kleuterskool in te skryf